

# **Kolosai**

## **Kine Kine Korop Pamaike Ea Wane Lewet Yemo Kristo, So Anutu Wane Gege Numa Me Tanik Manik Ene Wenen Kristo Wano Wat Watko Pamanmaike**

### *Mosop Don*

<sup>1</sup> Paulo, na Anutu wane pidon Kristo Yesu wane aposolo okangalane Anutu onjom biranange, so kimaze Timoti ene wenen.

<sup>2</sup> Neto Anutu wane nei nrep magu, Kolosai matko kimakopse Kristo wano nine tope kiaro mali malip korop gemami, ninane kibi iwa qe nibonmaite,

Anutu Magazenjo maine wet menan so peam niboniake.

### *Bakom Kito Meje Mejen So Mali Malip Korop Gege*

<sup>3</sup> Nene naso banem mejenka okanmaine, naso eao nere ninane detsorokenem paki, Anutu Waomze Yesu Kristo wane Magaine bakomine kito mejenka okanmaine. <sup>4-6</sup> Nere ninane don mo iwa yale detmaite, sigi maep wane don wele mo ninano wakonge detmami, nine kine kine bile, ea mo malip kakoi, ea mo Waom onjom ninane ma wakone more qeliwo motke, nine maikei wane tomaka gemami. Pakimo, nine yalewa wane Yesu Kristo malipka luke gemami, so Waom

wane magu nei n̄rep korop wet maep okan onmami. Pakimo, kepe ban̄em nei n̄rep loutneño malipka more sigi maep ra qelan̄ane mogare arimami, en̄ane gegeene ea mo maine menan̄maike. Tego yewaka n̄inane keuo wakonge, ea wane n̄ine kieke more mikepka sigi maep ea Waom wet maepinane kine mo maine dere lulukmami. <sup>7</sup> N̄ine Epaprasn̄o sigi maep wane done maine mo yewa kieke kito n̄idangi detkoi, Epapras en̄e Kristo wane urata nei wekumane, en̄e n̄enerop urataze weku, so n̄ene en̄ane manerop simin n̄onmaike, en̄e n̄ine qesiñ n̄une more Kristo wane urata maine mauluke wamaike. <sup>8</sup> N̄ene mo on̄om Waom wane nei n̄rep magu en̄ane don tanik manik so simile daleo detlukkene, don kisi yewa mo Asu Koboboin̄eño n̄ibonge, ea mo korop n̄edan wareke.

<sup>9</sup> N̄inane don kisiñine maine mikep detkone, naso yewaoka kieke n̄ene naso ban̄em Waomn̄o qesiñ n̄uniakane, n̄inane men̄enka gemaine, n̄ene Waom en̄ine simileine detkaikai wane, so Anutuñe simileinane dereret, ea Asu koboboin̄e wet dereret kine kine, ea qe watke n̄iboniakane olat okanmaine. <sup>10</sup> Paki mo n̄ine ban̄ eweke more Waomn̄o en̄ine nei n̄erewekoune gekei wane detmaike, ea wane rokop gekei, so naso ban̄em n̄ine urata kine kine ma okanbi, tanik manikñine kaki menageake, pakimo n̄ine ban̄ urata kine kine loutne maine maikai, so naso yewao Waom en̄ine detluk kaikai, so n̄ine wet dereret n̄ine naso ban̄em Anutu wano more en̄erop gege en̄e ban̄ sua ariake. <sup>11</sup> So n̄ene iwa yale men̄enka okanmaine, n̄ine Anutu en̄ine zonom togogole

wekumane, zonom yaline eaŋo ma togole ŋungi, ŋine maine togole okora more, umat kine kine kutŋino waki ewekeu paki, wet maepko batneka kauke okorau, umat ea baŋ mida leleake, paki ŋine wet pese dere bakom kitokei. <sup>12</sup> So ŋine batneka Magak bakomine kitokei, ea yemo, mo oŋo ŋibuki ŋine mo tanik manik me numa maine gesokmami, ea wane ŋine baŋ kine kine mayakakatne mo ŋinane biŋek qeke, ea maikei, ŋine ea baŋ Waom eŋine ŋei ŋerewekoune eŋerop maikei, tego me magu yewa ŋene mo Waom wane qelaŋan koto gemaine. <sup>13</sup> Nene mo panaman koto gekone, eŋe panaman wane zonomgo ŋine makok ŋonge paki, ŋebu seseŋone ari eŋine gipon maepinane mat urum koto bira ŋonge. <sup>14</sup> Yemo ŋene eŋane weŋemineŋo mo qoleŋone more siwot ŋonge, so sot turunze eamo mo mataliki siukke.

*Kristo Wane Masi So Uratainane Paulouŋo Rake*

<sup>15</sup> Nene Anutu maine mi kaikene, ŋo gipole Kristo eŋe Anutu sane, deŋo mi kakaine, eŋine kait toqa Anutu yale, eŋe Anutu eŋine alakan Medep, eŋe Anutuŋo yeye kine kine korop ma wakonge, ea wane lewet so eŋane suaineene. <sup>16</sup> Medep eaŋo, eŋane kutko so metino Anutu eŋe yeye kine kine korop qeli kotino so kepe kutno ma wakon wareke, kine kine deŋo kakaine, so mi kakaine, ea so aŋelo kine kine zonom ewe bibi-enerop, so asu zonom gorop, so kine kine natne asu qotkoinane zonom gorop, ŋei waom, ware ware, so ŋei ŋetne korop, Anutuŋo yeye kine kine korop eŋano so eŋane biŋek ma wakon wareke. <sup>17</sup> Kristo eŋe yeye kine kine korop ma wakongi,

enane bango mokaka qei kinoka kieke, ge sari geke, so yeye kine kine ea korop enane zonomno malipongi mayakakatneka, numaeno numaeno pawaremami. <sup>18</sup> Doku tau tau magu, eje enane kie metine korop, enane lewetene, yemo onom okanmaike, doku tau tau maguno enane solaine, eje solawane gege ma wakone more warekaki, doku tau tau eje gegeinerop okane pamaike, eje gege ea wane kine, eje Anutu wane medep alakan wako wakone, eje seu seuo nine wieke, ea wane kie kiek, onjo kieke wisikae wieke, yemo eje wekukuno alakane yeye kine kine korop qeli so kepe kotino, enane numaene maine onjo ma mo leweteene okanmaike. <sup>19</sup> Anutu eje detki menangi, gipole eje onomka Anutu enine gege so zonom wane namunine, enano wat watko payakane eje qe watke luke mange. <sup>20</sup> Anutu eje yeye kine kine korop, qeli so kepe kotino, koso ebu more, enino bira oniakane, so wet weku okanikei wane wetkeki paki, gipole birakaki, gipolejo kibego seukki, weneminejo peam so gege maep ma wakonge, pakiso yeye kine kine korop, kepe kutno so qeli kotino pamaike, ea koso ebu mainone more, enino takotone more bira onwareke.

### *Yesu Seu Seuinejo Miliyonge*

<sup>21</sup> Nine mokaka Anutu hadekkau paki, eri ekeket gekoi, so Kristo wane habakoune aman okane gekoi, onoka wane nine borikine kine kine makoi, so wetke magekoi, ea wane. <sup>22</sup> Wane ukude yemo Gipolejo sola bikumine korop wakone more kiben qabego wisika qolu seukke, masi

yewa wane Anutuño ejine njabakoune njebu milinj njonge, wetine weku okangi, yale okangi paki njebuki, koboboine, libe libe qelajan gorop, so sot midaine okane ejine kaitino gekei wane biranjonge. <sup>23</sup> Ea wane njine takotke more, mali malipño nago nagon njine okangi, eao ra bidange togogole okorakei, paki njine njidomka misuk detonbi, sigi maepño teba teba ma wakone njibonge, ea kine kine manenjo misuk ruzakki buratke kesiake, don kisi maine iwa yemo nej njerep korop kepe banem ra edan warekone, na Paulo sigi maep iwa, ea wane qelit nej okangole, paki, kepe banem nej enano njene zonom eanjo qebin njongi, urataze sorin borin mamaine.

*Paulonjo Kolosai Doku Tau Tau Magu Qesinjonge*

<sup>24</sup> Na njinane rawe paki, wikile kutno ge more, ukude na oi bakom so wetne pesemaiké, detpe nae solaneno wikile desikale, yemo na Kristo wane solainane wikile sotakine pamaiké, eamo doku tau tau magu, ea takotke qesinjka wikile desikale. <sup>25</sup> So na doku tau tau magu enane qelit nej, Anutuño neuki paki, urata ea mawe njine menangei wane ra ninge, ea yemo Anutu ejine donine korop ra qelajanbe, rokopkeakane ninge. <sup>26</sup> Don ea yemo sane, ene motkeki sanká qei kino njine nasoine nasoine korop pa saki, nej kine kine ene korop mi detkakoi, wane ukude yemo nej njerep doku tau tau magukoune enane kaitko didiwo maputulake sikan ongi, ka waremami. <sup>27</sup> Anutu wetinane kine yemo iwa yale, don saine ea tingo ra wakongi, nej njerep magu koune ene detkei, don san riwe morianine kakapa

suaine, so qei ewe zonom gorop, iwa yemo eņe ņei ņerep magukoune korop, ņine Yuda ņadino gemami, eņane binjek mage waremaiķe, so don sane yemo iwa yale, Kristo eņe ņinane kotoņino gemaķe, ea wane kine yemo ņine baņ Anutu wane kibi qelaņane ea weneņ eņerop qeliwo makei. <sup>28</sup> Ea wane ņene Kristo wane don kisi ņei ņerep korop ra ņidan okanmaine, ņene ņei ņerep korop girem ņidan okanmaine, so kito ņibon okanmaine, yemo korop wet so dereret korop, eamo ņei ņerep bonep bonep ņibuņem, ņine doku tau tau magu wele okane, Anutu wane kaitko maine lotke more, kotoņine menaņgi, Kristorop geķei. <sup>29</sup> Ea mawe qoeakane, na urataine togogole wikilerop, so qeka makainerop mamaile, Kristo ņo zonom suaine more ninmaiķe, eaņo naņane kotonon urata ma qelaņangi, na urata ea gereunerop mamaile.

## 2

### *Togogleka Kristo Malipka More Isi Don Kine Kine Ea Korop Qepap Kaikene*

<sup>1</sup> ņine iwa yale ņidanbe desikei wane nanmaiķe, na Laodikea matko ņei ņerep doku tau tau magu gemami, ņine korop so ņei ņerep doku tau tau magu natne eņe kaitne mi nangoi, ņinano urata suaine zok, ea qesiņ ņunikalane ma okanmaile.

<sup>2</sup> Na urata togogole yale mawe, eņane kotoeno sorin borinņo maine watke payake, so eaņo ma wisikae ņungi, Anutu wane ņei ņerep eņerop wet maepņo weneņ orodonķa qeturage maine weku paki, eņe dereret weleno riwe morian wat watko

tebakaki sarimaike, ea mage gekei, paki eņe ban Anutu wane san qabuine detluk kakei, ea yemo Kristo oņom ea wane kine okanmaike. <sup>3</sup> Eņe yemo ki, eaņo qekokki korop Anutu wane wet dereret so dereret aboņine kine mane kine mane, natne Kristo wane san motkeki pamaike, ea didiwo wakon wareake.

<sup>4</sup> Ea wane na ŋidanbe ŋine detonbi, ŋei natne edo misuk isi don so aņa kelok okane, eaņo isiņunikei, ea wane na don iwa ramaile. <sup>5</sup> Na solaneņo yemo abaran gemaile, ŋo wetneņo yemo ŋinerop gemaike, paki ŋine mali malipņine Kristo wano motpi paki, gesoke togogole koboine okorau ŋunbe, wetne menaņgi bakom kitomaile.

### *Kristo Wano Kito More Wisika Gege Maikene*

<sup>6</sup> Ŋine Kristo Yesu eņe Waom ŋine okaniakane makoi, wane eņane gegeo takotke more eņerop weneņ gekei wane rake. <sup>7</sup> So ŋine eņano togogole more okorakei, yemo ekiņo kepe qeirop ŋodine ma qotke okoramaike, yale ma qotke luke okorakei. So mat bosin togoleņo maņem metmaike, ea wane rokop ŋine mali malipņine togoleka bosin ŋine Yesu Kristo eņane so sigi maepine kito ŋidangone, yewa wa kutno motpi payake. So mali malip wane numa kito ŋibone more sikan ŋungone, ea wane rokopko mali malipņineņo manerop sua togoleake, so Anutu bakom man manņo ŋinano manerop pa ariake.

<sup>8</sup> So ŋine weneņ kaulukkei, ŋei maneņo eņine wetko ŋine isi don ŋei dereret isisine, wele midaine, ea kito amanagu sa gekoi, ŋei yaline eņe esep milop kopņine mo sogine mage sakoi, eņane

dereret so kepeo njine, asu qotkoine njene enjano njine, so ea enje Kristo wano njine wet dereret koboboine, ea mi magemami wane, njine ea wane diam seleleine makei.

### *Anutuŋo Kristo Wano Takotŋonge*

<sup>9</sup> Njine mo det waremami, Anutu wane wisika gege tanik manik, enjano Kristo wane kotino so solaino korop watke kepeo geke rokopke ware pamaike, paki, enje siluŋ nei yauwine yale njenane rokop wakonge. <sup>10</sup> Kine kine zonom gorop enjane lewet so njine gege, ea enjerop tako rakot wenen gekei wane njibonge, Kristo enje gege so numa kine kine mot okanmami, ea wane njene, so zonom kine kine pa ebonmaike, ea wane asu koboine so qotkoine enjane nei waom suaine magu enjane Lewet so Wawaineene.

<sup>11</sup> Enjano takotke enjerop gekoi, yewao njine kibi njibuke, nejno sola kita kitat kibi, eamo sola waneka midakaka, no yemo Kristo enjane kibi, gegenjine sogine borikineŋo watke watkine, ea wane zonom ge more siwot njungi paki, koto njino kibi njibuke, yewano masi koboboine okanmaike. <sup>12</sup> Njine miti doku taukoi, naso yewao njine Anutuŋo Kristorop wenen denesereo dukjunge, wane njine koso Anutu wane zonomno Kristo denesereo njine koso ma wieke, njine yewa malipka more miti doku tauwi, Anutuŋo njine koso Kristorop wenen ma wirikjungi wiekoi. <sup>13</sup> Njine mokaka qelan, solanjine Yuda wane kibi midaine geu paki, borikine kine kine qotkoine mau, enjano onja onjane mataliki seu seune gekoi, naso yewao yemo njine sozi numa gesokkoi,



pakimo Anutuŋo yemo siluŋ seu seuŋine Kristorop weneŋ ma wirikŋungi, wisikae wie more gege ŋine wakonge, so Anutuŋo turuŋze ea korop qeliŋwareke. <sup>14</sup> Eje sot kine kine okane gekone, ea wane rara togon donŋo sotze makoke ŋeboniakane, zaleine so nasoine more numaine kibiwo qe more sake, so ŋebu ma ket biraŋongi, eŋane zonomine bango gekoi, so dongo bira ŋoniakane rokop, eamo Anutu Magak oŋom korop sauke rakoke qeke matali more, ra rokop wane numa ea kiruŋaŋo Kristo wane kibego rasu pelekki siukwareke. <sup>15</sup> So kibeŋ qabeŋ kutno okora more, asu togogole eŋane zonom matali wareke, so Kristo eŋe oŋomka ŋei waom so ŋei wawaine eŋane zonomgo ŋine makok naguke, eŋe asu qotkoinine wawaine so zonom gorop eŋane zonom ma qororŋgi paki, ŋei ŋerep eŋane kaitko yuanone more, berum maki paki kineene ma wakonge, so eŋe iwa yale sikanonge, eŋe mo yuanone more maki, zonomene mida lele waremaike.

*Rara Togon Don Kine Kineŋo Mi Mapikŋoniake Nene Mo Yesu Kristorop Seuŋem Qoeke*

<sup>16</sup> Ea wane ŋei mane detkau, oŋo ŋara nene me doku nene, me zonom mama naso nigatne met met wane me meso musele ea wane taboŋ met met wane, me qezareko taboŋ met met wane numa mane misuk mosiake, so qom qe qe don okan ŋuniake. <sup>17</sup> Kine kine korop yaline, ea yemo baŋ ŋado kine kine wakoniake, ea wane oŋa oŋaine, ŋo wele yemo Kristo. <sup>18</sup> ŋei natne eŋe enŋenane ra okanmami, eŋe mayakakatne,

onoka wane eje wetene zingeki kulu kuluo kine kine ka okanmami, so solanjoka ketkele sola geu paki, anjelo menjenon okanmami, nei yaline detonbi misuk maket bira njunikei, nei yaline eje dereret sogine mogare okoramami, epane dereretenane tanikene yemo korop kine midaine eje enjenane detpi, mayakakatne okanmaike. <sup>19</sup> So eje Kristo maine mi malipka luke okoramami, onjo lewetze, no njene kie metine so sola bikumine, Kristonjo kie mete so sola bikum ea korop warekaki, epane bango geki njara gume kamaike, so tutuine ea maturage more ginogom gorop malipkeki, Anutuño suayakane det okanmaike, ea wane rokopko zonom mangi, sua togole okanmaike.

### *Seuke More Kristorop Wenenj Gekene*

<sup>20</sup> Njine Kristorop wenenj seukkoi, paki kepe so qeli wane asu qotkoine zonomno warenjungi gekoi, ea mo korop qelinj warekoi, pakimo njine onoka wane kepe iwa wane nei okane gemami? Njine onoka wane don numa iwa yaline dere tewekmami? <sup>21</sup> “Yewa misuk makene,” “Yewa misuk nekene,” “Ge yewa detkanom, eje gejane solanono misuk pora uagangep me?” <sup>22</sup> Rara togon don kine kine ea korop njene maikenane rau, urataine atak weku manjem eaka bori okanmaike, so ea yemo nei edomka rara togon don kito ebon ebon wane don so numa ea motkoi. <sup>23</sup> Welekatne, rara togon don yaline, yemo iwa yale kaikene, eje miti donno njebu wie wet dereretzte, ea qeu kesiake, pakimo solanjoka qebinjone gereune okan njonikei, ea wane nei natne

enɛ ramami, rara togon don eamo numa so dereret maine, solanɔka ketkele sola geu paki, so anɛlo mejenon okanmami, ea wele midaine, ɲo rara togon don yewanɔ maine mi qesin ɲoniake, ea wele midaine, so gege me wet dereret sogine ea mi qeki kesiake.

### 3

#### *Nene Mo Yesurop Wisikae Wiekone*

<sup>1</sup> ɲine mo Anutuɲo Yesurop ma wirik ɲungi wisikae wiekoi, ea wane ɲine wetɲine motpi, weti qeli kotino yeye kine kine pamaike eao payake, ea wane urataine maikai, yewao Kristo enɛ Nei Waom wane metino, Anutu wane wonino metmaike. <sup>2</sup> Ea wane ɲine wet dereret ɲine motpi, kine kine weti wane koboine ariake, iwa kepeo yeye kine kine pamaike, yewao misuk motpi payake. <sup>3</sup> ɲine, mo kepe wane ra more seukko, ɲo ɲinane gegenine yemo Yesurop wenen Anutu wano san siu siuko pamaike. <sup>4</sup> ɲinane gegeninane wele so kine yemo Kristo, wane enɛ didiwo wakonniake naso yewao, ɲine ban yaleka enɛrop wenen didiwo wakonikei paki, enane qeli ewe zonom so qelanɛn ea wane kotino bira ɲuniake!

#### *Nene Wakonluke More Nei Nɛrep Musele Okangene*

<sup>5</sup> ɲine koto ɲino kepe wane simile kine kineɲo urata ma okanmaike ea qeu siukeake, kine kine iwa yale, ɲerep yau yaup ebu ebu, masi tanik diinerop oka okan, borikine mama wane qom wieki, simile zok mage mage, sigit borikine, so wetɲo ɲei natne enane kine kine wane bailalan

qole qole, ea yemo lopio so waom isisine mejenka okanmami. <sup>6</sup> Ea wane nei yaline borikine kine kine me masi tanik manik ea okan more, Anutu sot osiosi okankau, turuene borikine ma more toma onmai ke, enane anaine mi dere tewek okanmami, nei yaline enane kuteno ban payake. <sup>7</sup> Sogine nine yalewaka nei yewa enerop geu, gegenino tanik eno watke paki, masi kine kine yaline ma gekoi.

<sup>8</sup> Wane ukude yemo nine kine kine ea korop qelin warekei wane ramaile, sot osi osi, wet togon, so kotonjoka naba wetke mage mage, don sigigitne me don sinoine sogino nine ra kima natne eda edane, ea mane misuk pinjino nine sakesiake. <sup>9</sup> Nine doku tau tau isisi natne enerop misuk okan nagukei, onokawane nine kotoninane wet dereret sogine tanik maniknine qotkoinerop kine mane eamo qelinka warekoi. <sup>10</sup> Pakimo nine nei musele okangoi, ea yemo Waom onom nibukimo, nine nei musele okangoi, ea wane ene dereret musele natne zok manerop koso nibonge, paki ene nibuki nine nei musele, so enine tanik manik so kait toqaine ea wakon lulukkoi. <sup>11</sup> Nene mo nei musele okangone, ea wane weleine, yemo nene Grik nei enane tego me Yuda nei enane tego mida, me nene solaene mo kita kitatne me mi kita kitatne, kubai nei me sawek nei, nene taongo nine me mat neine, qelit qe qe me nei wawaine, midakaka, Kristono yemo korop, kotozo qeturan none ge waremai ke, so gege me wet dereret sogine ea esopka nebongi paki, korop gege muselo nebu biranon okangi paki, onom keuzo ge waremai ke.

*Mitiwo Wet Maep Korop Gege Ea Wane Don*

<sup>12</sup> Njine enjane nej njerep okane gemami, eje njinane zok manerop siminkamaike. Ea wane njine masi tanik kine kine iwa yale okanikei, kima natne enjane zok manerop qom borik okanikei, so mauluk onikei. Njine njinjine ma ket bira nagu more, nej bororom okan onikei, so nej edo matali njunbi, ea wane ra qom gerep misuk marat kaikei, wet momoine, enjo takotnjine okangi, birau ke-siake. <sup>13</sup> No nej mane keunjino, eje don mane kimainenjo kine kineine mane mo matali mangeo, eje umat yewa mawaluke more, kimainane sot ea qelige maniake, njinane sot turunjine eamo suainenjo qelige njibonge, ea wane njine yale waka kima enjane sot turunene qelige ebonikei. <sup>14</sup> Njine wet dereret njinenjo kimakop njine nej njerep natne ea ebu malip onlukkei, masi yewanjo tanik manik natne, ea korop yuanka waremaike. Pakimo, enjo sua wakone togoleakeo, yemo maine wet qedugu okora okora, ea wakoniake. <sup>15</sup> So eje njine yale waka sikan njungi, bororomgo okan nagukei, pakimo bororomgo wet maep korop gege, enjo wetnjine warekaki, maine geulukkei, Waom eje njidora newan njungane, njine sola bikum weku okane more, wet maep okan luluke gekei, so naso banem Waom wane bakom kito mawaka gekei. <sup>16</sup> Kristo wane don korop riwe morianine suaine, enjo yemo njinane kotonjino ket more payake, kito ama nagu qema nagu so matogole qetogole eamo wet dereret korop okangei, miti sogine enjet kitokei, miti musele enjet kitokei, so bakom enjet kitokei, Anutu koto njinenjo oi bakom okankau

paki enjet kitokei. <sup>17</sup> Yeye kine kine okangei me rakei, yemo korop Waom Yesu wane enjetko ora okangei, eamo njine enje bakomine kito more Anutu Magak oi bakomine kitokei.

*Nao Njanom, Njerep Medep So Nabok Magak Enjane Don*

<sup>18</sup> Njerep, njine njaokopnjine enjane bango ge more anjaene tewekkei, njine doku tau tau magu gemamiño yemo yale okane gekei, masi me tanik manik yewano suaineze Yesu wane kaitko mayakatne okaniake.

<sup>19</sup> Njei, njine njanowekopnjine wet maep okanongei, so don togole misuk okan onge, paki weteene mau misuk sigileake, njine njanowekopnjine enjane simin njuniake.

<sup>20</sup> Njerep medep nigatne, njine yewamo doku tau tau magu njinane urata so numa njine togogle naso banjem nabok magak kine kine wane ra njunbi, anjaene tewekeu, Anutuño detki njinane similekayake.

<sup>21</sup> Nabok magak njine doko njine okanonbi, so-teene osiki busu misuk lelekei, njine njerep medewekopnjine sot osi osiwo okan onbi, kotoene misuk matalikei, enje yale okanikeiwo, yemo enje urata wele mane maine mama wane mi wetkekei.

*Qelit Mama So Njei Waom Enjane Don*

<sup>22</sup> Urata medep njine ware warekopnjine, enjane don kine kine korop ea tewekei, njine don kelok okane more enje osop osop geu, enjane ra more me edo njunikei wane ra urata maine maikei. Yale mida, no njine weti suainane kaet njungi, njine naso banjem dereretjoka nasoo, numaino, mau

menañ geakane wetkeu, paki makei. <sup>23</sup> Njine urata kine kine natne makei korop maikei yewa njine kotoņo simile dere more wet korop togogleka mauluke maikei so Waomņo detki menageakane wetke makei, so nej edo detpi menageakane midakaka. <sup>24</sup> No detmami, njine Waomņo baņ turuņine njiboniake, paki yemo mo oņom nej njerep magukoune eņane biņek kine kine wareki pamaike ea baņ njine njibongi makei, Kristo eņe nej Waom welekatne, njine aņaine teweke qelitrine qe okanbi, oņom njinane ware ware wele okan njuniake, yewao baņ njibongi makei. <sup>25</sup> So nej mane eņe borikine mama, urata borikine mayake, ea wane turuņine yemo eņe baņ lewine borikineka mainge maniake, Anutu eņe nej gege mageenane rokopko wanok one okanmaike, eņe baņ nej borikine ea mi lolon oniake.

## 4

<sup>1</sup> Urata medep eņane ware warekopeene, njine numa maine so bileka okanonikei, njine mo detmami, njinane ware ware Waomze suaine eņe yale waka weti qeliwo gemaike.

### *Meņe Meņen Wane Don*

<sup>2</sup> Njine meņe meņen wane numa togogleka matogole ma gekei, paki, njine meņen kakei, naso yewao baņ detluk kaikei, ea wane njine diamņine mau paki, meņe meņen gorop Anutu oi bakomine kito okane gekei. <sup>3</sup> Naso yewaoka Waomņo njene qesiņ njoniakane, weneņ meņen kakei, pakimo Anutuņo njenane numa maine lalage njebongi, eņine miti donine ra more Kristo wane don sane

rawakone edanikene, don kisi eamo sogino san pake, naso iwao yemo mo wakonge, pakimo nej loutneṅoka, ea wane zok mi onmaike, kine ea wane ra more na mulap urungo iwa biranan-goi metmaile. <sup>4</sup> Ea wane njine mejenkau qesiṅ nangi eweke more, na miti ea didiwo maine ra qelanṅangale, Waom eje nanane yalewa wetke-maike, na urata ea maine maikale.

<sup>5</sup> Nei qelanjine mali malipene midaine doku tau tau magu ea wane ṅadino gemami, eṅerop gekei, naso yewao njine numa bile so dereret tanik manik koboboine okanikei, njine naso baṅem ewek luke more, eje Yesu Kristo wane numa me tanik manik bile ea sikan onikei. <sup>6</sup> Naso baṅem njine don maineka raikei, nej don kine kine desikei wane onmaike, ea raikei, paki njine maine detlukeu paki, don koboboine nej korop mainge ebonikei.

### *Tikikus So Onesimus Erane Don*

<sup>7</sup> Nenane kima maepze Tikikus, eje urata nej mayakakatne, so eje Waom wane uratao qelit nej kimaze wekumane, oṅo urata kine kine mamaile ea wane donkisi baṅ ṅidaniake. <sup>8</sup> Ea wane na eje talekawe njinano umaike, njene korop iwa daleo gemaine, njenane don tanik manikze so kineze ea wane ṅidaniake, so eje don ṅidane more, eje njinane wet mali malipnjine, ea ko-rop ma togoleake. <sup>9</sup> Eṅerop weneṅ birakawe uyake, yemo Onesimus, eje njenane kima maepze mayakakatne, eje njinane magu oṅine Kolosai kimanjine, eto kine kine iwa wakonmaike, ea wane donkisi baṅ korop okanṅunikeik.



### *Don Qoiqoino Pauloŋo Kaiwe Maine Ebonge*

<sup>10</sup> Aristarkus, eŋe narop mulap urumgo weneŋ metmaite, oŋo ŋine kaiwe maine ŋibonmaike, so Mareko eŋe Barnabas wane ŋeweune, eŋe yale waka ŋine kaiwe maine ŋibonmaike, ŋine eŋane don kisiine mo ra ŋidanbe detkoi, wane ŋinano u lotkeakeo, yemo ŋine kima okane more oi bakom okankakei. <sup>11</sup> Yosua, eŋetine mane Yustus, eŋe yale ŋine ka kaiwe maine ra ŋibonmaike. ŋei iwa eŋe Yuda ŋei, eŋe kareweŋoka narop Anutu qeli ewe zominane urata mamaine, so eŋe koropŋo zok urata suaine manerop qesiŋ nangoi.

<sup>12</sup> Epapras ŋo kaiwe maine ra ŋibonmaike, eŋe ŋinane kimanine maguo ŋine, so eŋe Kristo Yesu wane qelit ŋei, eŋe naso baŋem ŋinane ra gereunerop meŋenka okanmaike, eŋe Anutu meŋenkaki, oŋo ŋibuki ŋine doku tau tau magu wele okane more gesoke togole ŋei okora okorao lalipke okorakei, paki eŋane don wane rokopko kine kine detluke Anutu wane simile yewaka mogare gekei. <sup>13</sup> Na eŋane kineine maine ŋidanbe, eŋe urata togogole qesiŋŋune more ma okanmaike, ŋine so Laodikea matko ŋine doku tau tau ŋei ŋerep eŋane so Hierapolis matko ŋine eŋane weneŋ. <sup>14</sup> Luka, ŋenane dokta maepze eŋane zok siminŋon mageake, eŋe so Demas ere kaiwe maine ra ŋibonmamik.

<sup>15</sup> Ŋene kaiwe maine ra ŋibonmaine, ea kima kopze Laodikea matko gemami so Nimpa so doku tau tau magu Nimpa ŋerep kimaze mane wane matko lewaŋ okanmami eŋe ebonikene. <sup>16</sup> Ge kibi iwa dapotnom qoeki, ea wane ŋadino ge

desikene, ea yaleka doku tau tau magu Laodikea matko ɲine eɲano weneɲ dapotpi, eɲe desikei. Naso weku yewaoka, na kibi mane Laodikea eɲano qe ebongole, ea weneɲ daposikei. <sup>17</sup> So Aki-pus olasikei, ge Waom wano ɲine urata makone, ea manom qoe wareake.

<sup>18</sup> Nae meteneɲo kibi sisinimde iwa qemaile, Na Paulonjo kaiwe maine ɲibonmaile! Na mulap urumgo pamaile, ea deskei!

Anutu wane dan gunutɲo maine ɲinano tako rakot pa ari payake.

**Waom Yesu Wane Sigi Maep Don**  
**The New Testament in the Ono Language of Papua**  
**New Guinea**

**Nupela Testamen long tokples Ono long Niugini**

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963